

Communicaziun da medias digl cumegn da Surses (nr. 05-2018)

Surses: approvaziun digl preventiv cun grondas investiziuns bruttas

La radunanza communalà è approvo glindesde seira cun fitg gronda pluralitad igl preventiv 2019. Igl chint economic prevei en surple d'antradas da 305'000 francs. Las investiziuns bruttas montan a radond 17.3 milliuns francs. Igl pe da taglia stat sen 100% dalla taglia simpla digl cantun Grischnun.

Tar antradas da radond 31.4 milliuns francs ed expensas da radond 31.1 milliuns francs prevei igl preventiv en surple d'antradas da 305'000 francs. Las investiziuns bruttas montan a 17'338'000 francs (investiziuns nettas 12'779'500 francs) e pertotgan d'ena vart l'infrastructura communalà cun la sanaziun da veias e conducts d'ovras scu er la sanaziun da plom ed igl madem mument l'amplificaziun digl implant da teir Livizung a Rona. Ainten las investiziuns èn pero er cumpiglias ampres, participaziuns e contribuziuns da promoziun, gio approvos, per projects turistics da total 6,89 milliuns francs.

Approvaziun da divers credits e angulivaziun tar las finanziaziuns spezialas

An connex cun igl preventiv è la radunanza communalà er approvo igls suandonts credits per projects d'investiziun: fr. 270'000 per la sanaziun dalla veia cantunala Rona - Rona Soura cun igl ramplazzamaint digls conducts d'ovras digl cumegn (5avla e davosa etappa); fr. 630'000 per la sanaziun dalla veia Parsonz - Tigignas (4. etappa); fr. 300'000 per la sanaziun dalla veia Tgaplottas a Savognin; fr. 220'000 per la sanaziun da plom e fr. 280'000 per l'amplificaziun digl implant da teir Livizung a Rona.

Ultra agls credits è la radunanza communalà er consantia agl transport unic d'en milliun francs digl conto dallas obligaziuns dalla finanziaziun speziala "dismessa d'ava persa" sen igl conto dallas obligaziuns dalla finanziaziun speziala "provedimaint d'ava" per igls 31-12-2018. Cun chella maseira duess neir equilibrada la disproporziun dallas taxas actualas.

Credit supplementar per compra d'aczias dalla Pendicularas Savognin SA e credit posterieur pertutgont la cunvegna da prestaziun cun l'organisaziun turistica

La radunanza communalà è approvo cun gronda pluralitad igl credit supplementar da fr. 128'500 per la compra d'aczias dalla Pendicularas Savognin SA. An vista agl ramplazzamaint dalla soptgera existenta da Savognin a Tigignas tras ena telecabina da 10 nova, è la radunanza generala dalla societad anonima decidia igl settember 2018 igl dulzamaint digl capital d'aczias. Igl cumegn da Surses profitescha dalla pussebladad da signier ainten l'amprema ronda aczias per fr. 128'500. La participaziun actuala digl cumegn alla Pendicularas Savognin SA è 14.05 %. Cun clera maioritad è er nia approvo igl credit posterieur da fr. 428'000 an favour dalla Turissem Savognin Beiva Alvra SA, tgi è neida fundada da nov igl matg 2018. Chel credit posterieur è basignever, percheigl tgi gl'è nia fatg ena cunvegna da prestaziun nova cun la societad turistica. Chella cunvegna cumpeggia ultra allas prestaziuns dall'antieriura uniuon Savognin Turissem an Surses anc incumbensas supplementaras, scu per exaimpel igl svilup economic dalla regiun.

Ulteriouras decisiuns

Pinavant è la radunanza communalà concludia sainza cuntervusch da lascher igl pe da taglia per igl onn 2019 sen 100% dalla taglia cantunala simpla. Ultra da chegl è nia decidia da fixar nignas restricziuns pertutgont las quotas per la vendita d'immobiglias ad esters pigl 2019, tenor la practica actuala.

Alla fegn è la radunanza communalà er delibero la revisiun parziala pertutgont igl nov biketrail aint igl territori da Somtgant a Tigignas. Cun chella revisiun parziala duess neir stgaffia la basa

per la realisaziun d'en biketrail cun ena lunghezza da radond 6.7 km per augmentar l'attractivitat dalla regiun da vacanzas.

Ulteriouras infurmaziuns dat igl mastral Leo Thomann (telefonign 079 405 96 73)

Tinizong, igls 3 da december 2018